

**Uunga siunnersuut: Aalisarnermut aningaasaliissutinut immikkoortitat pillugit Inatsisartut inatsisaata allangortinneqarneranik Inatsisartut inatsisaat**

(Pingaarnerusumik malittarisassamiit atuutsitsinngitsoorneq tassalu angallatip isaterneqarnerani aalisarsinnaanermut akuersissutip atorunnaartarnera)

**Saqqummiussiissut**

(Aalisarnermut, Piniarnermut Nunalerinermullu Naalakkersuisoq)

**Siullermeerneqarnera**

Naalakkersuisut sinnerlugit matumuuna saqqummiutissavara Aalisarnermut aningaasaliissutinut immikkoortitat pillugit Inatsisartut inatsisaata allangortinneqarnissaanik siunnersuut.

Ukiakkut katersuunnermi 2011 immikkoortoq 104-tut Inatsisartunit suliarineqarpoq angallatip isaterneqarnerani tapiissutinik tunniussisarnermi tapiissutit qummut killigititaannik qaffaanissaq. Siunnersuutip pingajussaaneerreqannginnerani Aalisarnermut, Piniarnermut Nunalerinermullu Ataatsimiititaliap Naalakkersuisut kaammattorpai 2012-imi upernaakkut katersuunnermi allannguutissatut siunnersuummik saqqummiusseqqullugit. Kissaataavoq allannguutissatut siunnersuutikkut periarfissiisoqassasoq, angallammik piginnittup ataatsip aalisarnissamut akuersissut aamma aalisarsinnaanermut akuersissutit pigiinnarsinnaassagai, angallatip isaterneqarnissaanut tapiissutink qinnuteqaammut peqatigitillugu aamma qinnuteqaateqartoqarpata angallammik nutaamik pissarsinissamut tapiissutinik.

Naalakkersuisunit kissaatigineqartoq eqqarsaatigalugu, tassa sinerissamut qanittumi aalisarnermi aningaasaqarniarnikkut akilersinnaasunik aalisariuteqarnissaq, kiisalu aalisarluarsinnaasunik, unammillersinnaasunik nutaaliaasunillu aalisariuteqarnissaq tunngavigalugu Naalakkersuisunit ataatsimiititaliap inatsimmut siunnersuutip allangortinneqarnissaanik kissaataa akuersaarneqarpoq. Tamakkiisumilli atuutsitsilerneq inatsisip siunertaanut tassalu aalisarnermi aqqissuussaannikkut naleqqussaasoqarnissaanut akerliussaaq. Naalakkersuinikkut kissaatigisap inatsisip siunertaanut sanilliullugu oqimaaqatigiissinniarlugu siunnersuummi taamaallaat aallaavigineqarpoq pingaarnerusumik malittarisassamit atuutsitsinngitsoornissaq aalisartut marluk arlallilluunniit kattullutik angallammik nutaamik pisiniarpata. Taamaasilluni siunnersuut periarfissiinnigilaq aalisarsinnaanermut akuersissummik piginniinnarsinnaanissaq kisimiilluni angallammik nutaamik pisiniaraanni.

Allangortitsinerup kingunerissavaa, aalisartut arlallit kissaatigippassuk angallatitik isatertinniarlugit, sulili kissaatigalugu aalisarsinnaanissamut periarfissaqarnissaq, taava kattussinnaassapput angallammillu nutaamik pissarsillutik.

Taamatut oqaaseqarlunga allannguutissatut siunnersuut Inatsisartunut akuersaartumik suliarineqartussanngorlugu tunniuppara.